

## A P O L O G I E

D E

L O V Y S E B O V R G E O I S

D I T E B O V R C I E R S A G E  
femme de la R O Y N E M E R E du  
R O Y , & d e f e u M A D A M E .


*Contre le Rapport des M E D E C I N S .*




A P A R I S ,

Chez MELCHIOR MONDIERE,  
en l'Isle du Palais, rue de Harlay,  
aux deux Viperes.

M. D C. XXVII.  
A V E C P E R M I S S I O N .





# APOLOGIE DE LOUYSE

*Bourgeois dictée Bourcier. Contre le  
Raport des Medecins.*

**L**E fous-signée Louyse  
Bourgeois dite Bourcier  
sage femme de la Reyne  
MERE, & de feu M A-  
DAME, ayant veu vn rapport im-  
primé de l'ouuerture du corps de feu  
MADAME, fait & dressé par les  
Medecins, qui ont assisté madite  
Princesse en sa maladie, pour iustifier  
leurs actions au traictement, & reiet-  
ter sur moy la cause de la mort. I'ay  
creu qu'il estoit de mon deuoir de  
faire cognoistre la verité du faict,  
tant en l'accouchement, qu'en la ma-  
ladie, & monstrier tres-euidemment,  
que la cause de la mort n'est point

cette portio de l'arriere faix pretēdu.

MADAME tout le long de sa groisse s'est trouuée fort mal, ayant fort fouuent la fievre, des grandes chaleurs, saignemens de nez, la toux aux derniers mois, & pour tels accidens fust saignée trois fois. Or deuant qu'accoucher elle auoit la fieure, qui ne s'est point passée par son accouchement, lequel par la grace de Dieu, fust assez heureux, tant à la sortie de l'ēfant, que de l'arriere-faix, qui estoit sain & entier, ayant esté visité & examiné par Iacques de la Cuisse Maistre Chirurgien fort expérimenté aux accouchemens des femmes, & par les Medecins presens, Messieurs Vautier, Seguin, Le Maistre, Tournaire, Brunier, Guillemeau, qui ont tous recogneu & confessé l'arriere-faix estre tres-sain & bien entier, ce que ie certifie estre veritable au peril de ma vie.

Car cette petite portion de l'arriere-faix pretenduë, *tellement attachée à la matrice qu'on n'a peu la separer sans peine avec les doigts.* N'est pas vne portion de l'arriere-faix, ains la place où estoit attachée la masse de chair, que l'on nomme vulgairement arriere-faix, laquelle place demeure toujours plus eminente & releuée, que tout le reste de la superficie interne du corps de la matrice, iusques à la parfaicte euacuation des vuidanges, à cause de l'abboutissement des vaisseaux de la matrice, qui se faiet en ce lieu avec les vaisseaux ombilicaux de l'enfant. Tellemēt que cette eminēce estat de la propre substāce de la matrice, a esté ignorāment & malicieusement prise pour vne petite portiō de l'arriere-faix; d'autant que l'arriere-faix n'est qu'une chair mollasse, comme yn sang caillé, qui ne peut si fixement s'attacher & coller contre les

parois de la matrice, & la s'endurcir de telle sorte, les vuidanges coulants tousiours par les veines de la matrice, comme ils ont tousiours flué à M A D A M E, qu'il la faille separer avec peine, & par le rasoir, comme on a fait. Car l'ardeur de la fieure n'a presté suffisante de seicher & conuertir cette portio de chair en membrane, parce qu'elle estoit continuellement arrousée par le sang, qui a decoulé iusques à l'heure de son decez; joinct qu'entre la substance de la matrice & la chair mollasse de l'arriere-faix, il n'y a point de membrane moyenne, pour retenir & coller cette portion d'arriere-faix pretendu contre les parois de la matrice.

De plus vous sçaurez que la matrice d'une femme enceinte, plus d'un mois auant son accouchement, & huit iours apres s<sup>on</sup> accouchement, est composée de plusieurs peaux, &

membranes couchees les vnes sur les autres , comme les pelures d'un oignon , & que dans les espaces d'icelles membranes est contenu quantité de sang, comme dans vn esponge, lequel par expression, la matrice s'estre-  
cissant & rappetissant de iour à autre, s'esgoutte petit à petit. Tellement que ce qu'on a arraché de la matrice est vne portion du lieu plus eminent de la membrane interieure, ou estoit attaché l'arriere-faix, qui s'enleue comme la pelure d'un oignon. Vous eussiez mieux couuert vostre finesse, & si i'ose dire vostre malice, si vous eussiez depecé la substance de la matrice en plusieurs peaux; ce qui est fort aisé à faire avec les ongles, par là vous eussiez mieux fait recognoistre la gangrene de la matrice, qu'auoit causée cette petite portion de l'arriere-faix pretendu: mais celuy qui a donné l'inuention de supposer cette por-

tion de l'arriere-faix par le dechirement de la membrane charnuë de la matrice, ne s'estoit pas aduisé de cet artifice.

La contrarieté, qui se remarque en vostre rapport, touchât la gangrene de la matrice, que vous pretendez tacitement estre cause de la mort, faict assez cognoistre que vostre intétion, en publiant vostre rapport, a esté de me charger de tout le blasme, pour vous mettre a couuert.

*Car si la matrice estoit gangrenée depuis la partie externe iusques au fond, speciale-  
ment du costé gauche; Il falloit de nécessité que le costé droict du fond de la matrice, ou estoit attachée cette portion de l'arriere-faix pretendu, fust aussi gangrené plus apparemment que le costé gauche, duquel vous avez seulement parlé; Vous deuez aussi rapporter, si cette portion de l'arriere-faix pretendu, que vous avez eu tant de peine*



de peine a separer avec les doigts au costé droict de la matrice , estoit pourrie, pour auoir donné *la gangrene au costé gauche, & a la partie assise sur le rectum.* Par vostre rapport vous faictes assez cognoistre, que vous n'entendez rien du tout en la cognoissance de l'arrierefaix & de la matrice d'une femme, tant auant, qu'apres son accouchement; non plus que vostre Maistre Galien, lequel pour n'auoir iamais esté marié, & auoir peu assisté les femmes en leur accouchement, s'estant mélé d'enseigner vne sage-femme par vn liure, qu'il a faict exprés, il a faict parestre, qu'il n'a iamais cognu la matrice d'une femme enceinte, ny mesmes son arriere-faix.

Et pour vous certifier d'auantage que ce que ie dis contient verité, ie m'offre de le verifier en l'hostel Dieu sur les corps des femmes, qui meurent dans la huietaine apres leur ac-

couchement , & de plus en passeray condemnation par le iugement des Medecins , & Chirurgiens sçavants en l'Anatomie, pourveu qu'ils ne soient point liguez & vnis ensemble, par cabale tres dangereuse au fait de la Medecine, lesquels sans passion, selon leur science & conscience iugeront sur vostre rapport & le mien. Je m'asseure que ie seray renuoyée absoute & déchargée du blasme , & vous autres aurez le tort de vostre costé, & que la pauvre matrice faulxement accusée de gangrene, n'aura pas esté cause de la mort, mais l'inflammation de tous les visceres du ventre inferieur, *duquel selon vostre rapport toute la capacité estoit remplie de matiere sanieuse, la matrice mesme n'ageoit dans une matiere sanieuse.* Cette grande quantité ne pouuoit venir d'ailleurs, que des veines & visceres enflamez, & en fin gangrenez, qui auoiét suin-

été toute la serofité du fang, dans la  
 capacité du ventre, c'est le jugement  
 qu'en fit le sieur Riolan Medecin en  
 presence du Roy, de la Reyne Mere,  
 & de Monseigneur le Cardinal, que  
 la cause de la mort (pour lors ineuita-  
 ble) estoit la gangrene formée dans  
 les visceres du ventre inferieur, qui  
 estoit tendu comme vn tambour, &  
 aussi ample que si elle n'eust point ac-  
 couché, qu'il ne iugeoit aucune ten-  
 sion en la region de la matrice, ce qui  
 fust approuué des autres Medecins  
 presens: Adioustez que feu Madame,  
 depuis son accouchement iusques à  
 l'heure de sa mort, à tousiours eü vn  
 flux de vêtre de bile porracée, verda-  
 ste, tirant sur le noir, qui est vn tes-  
 moignage tres-certain d'une grande  
 chaleur & pourriture des entrailles.  
 Tellement que telles matieres passās  
 par les gros intestins, ont donné cette

alteration que vous remarquez à la partie de la matrice assise sur le rectum. Vous eussiez plus honnestement escript assise sur le gros intestin.

Si vous eussiez esté bien fidelles & bien entendus a faire vn rapport, avec vn bon dessein de faire cognoistre la verité, vous n'eussiez point obmis les remarques necessaires dás vn rapport, ny inferé des faulsetez, Vous deuiez en premier lieu specifier la grandeur enorme & excessiue du ventre inferieur deuant & apres la mort, qui tesmoignoit assez la gangrene du ventre inferieur, laquelle suppose inflammation, qui ne s'est point formée en vingt quatre heures. Vous deuiez aussi faire mention de la couleur & consistance des parties, qui est ce qui se change plustost aux maladies, & sur quoy l'on préd certaine cognoissance de la cause de la mort, ou vous

ne cognoissez pas la couleur & consistence naturelle des parties, pour discerner le changement ; ou bien cela faisoit contre vous, pour ne point aduouër l'inflammation & gangrene des visceres. Car à quel propos de remarquer la grandeur & petitesse du ventricule, du foye, de la vesicule du fiel, de la ratte, des reins, & de la vessie, qui est en toutes personnes petite, quand elle est vuide, & ne rien dire de leur couleur & consistance, ny mesmes de la matrice, de laquelle vous deuiez particulièrement exprimer la grandeur. Vous avez observé les poulmons bien sains, sans aucune adherance aux costés, le cerueau sans aucun vice. Vous deuiez aussi declarer si les parties du vêtre inferieur estoient saines ou gastées ; ce que vous n'avez pas osé toucher, vostre conscience vous condamnant. Si vous eussiez eû vn bon dessein de faire co-

gnoïstre la verité, vous deuiez appeler avec vous d'autres Medecins, nullement interessez en cette affaire, ou de ceux de la maison du Roy, ou bien quelques Medecins de Paris, pour n'estre seuls iuges & parties en vn affaire de telle importance. Je m'assure qu'il se fust rencôtré des gens de bien, fort entendus en telles matieres, qui n'eussent iamais enduré cette supposition de l'arriere-faix, qui auoit esté auant l'ouuerture du corps concertée & arrestée, pour renuoyer sur moy route la cause de la mort, & n'eussent iamais permis, qu'on eust nommé dans le rapport des personnes qui n'ont point assisté à l'ouuerture du corps, qui sont Messieurs Brunier & Guillemeau, & qu'on eust oublié ou mesprisé l'attestation de Maistre Iacques de la Cuisse Chirurgien, sans parler aucunement de luy, lequel

neantmoins m'a tousiours assisté en l'accouchement de feu Madame, & qui estoit present à l'ouuerture du corps, soustenât en presence de tous, que ce qu'ils dechiroient avec les ongles & le rasoir, n'estoit point de l'arriere-faix, ains portion de la membrane charnuë, & interieure de la matrice, faulseté suffisante pour convaincre tout le rapport d'infidelité.

Ie ne suis point si meschante, ny si ignorâte en ma vacatiõ, laquelle depuis trente-quatre ans i'exerce en cette ville, & à la Cour, avec honneur & fidelité, comme ie l'ay tesmoigné par les effects heureux, & par les liures que i'en ay composé, qui ont esté par diuerses fois imprimez, & tournez en toute sorte de langues, avec remerciement des plus grands Medecins de l'Europe, qui ont profité à la lecture de mes liures. Que si

i'eusse recognu auoir laissé quelque portion de l'arriere-faix, que ie ne l'eusse dit pour y remedier, ou bien ne l'ayant pas deslors remarqué (ce qui est neantmoins fort aysé à cognoistre par l'inspection de l'arriere-faix) ie l'eusse dans vingt-quatre heures découuert par les accidens, qui arriuent tousiours aux femmes, lors qu'il est resté quelque portion de l'arriere-faix. Or il n'a paru aucun accident de telle nature, car les vuidanges n'ont iamais esté de mauuaise couleur, ny fetides : & vous autres Medecins si vous estiez experimenter aux maladies des femmes accouchées, vous nous en deuiez aduertir pour y prendre garde plus soigneusement. De plus ie maintiens que quand il seroit resté vne portion de l'arriere-faix (ce qui n'est point) elle se fust pourrie, separée & vuidée, avec  
le sang



le sang qui a tousiours coulé, iusques  
à l'heure de sa mort, comme la  
praticque nous l'apprend tous les  
iours.

Si vous alleguez que feu M A D A-  
M E au quatriesme iour de son ac-  
couchement, vuida quelques peti-  
tes membranes aussi desliées qu'une  
toille d'araignée, qui pouuoit estre  
quelque petite portion de la mem-  
brane amnios ou chorion si vous  
voulez: Je vous respondray ce qu'on  
m'a dit qu'Hippocrate fort sçauant  
aux maladies des femmes, comme il  
a fait par estre par tant de liures, qu'il  
a escript sur ce subiect, a remarqué au  
second des Epidemies, que la femme  
d'un Conroyeur, après estre accou-  
chée & bien deliurée, le quatriesme  
iour vuida vn morceau de membra-  
ne sans aucun mauvais accident.  
Voulant ce grand personnage faire

cognoistre à toute la posterité, que  
cela n'est point dangereux & de nul-  
le consequence.

Iamais il ne s'est veu ny leu dans au-  
cun bon Auteur, qu'une petite por-  
tion de l'arriere-faix defechée collée  
contre la matrice sans pourriture eut  
causé la mort. J'ay leu d'as Paul Aegi-  
nete en sa Chirurgie, que le Medecin  
ne doit pas s'estonner, si une femme  
n'a vuide son arrie-faix, d'autant qu'il  
y en a qui le reiettent par morceaux  
ou reduit en pourriture quatre ou  
cinq iours apres l'accouchement. L'on  
m'a aduerti qu'un grand Chirurgien  
& Anatomiste nommé *ab Aquapen-*  
*dente* est de mesme aduis, & qu'il a  
veu plusieurs femmes avoir reiecté  
leur arriere-faix par morceaux ou re-  
duit en pourriture sans mourir. Par  
tant vous avez tort d'attribuer la  
cause de la mort à cette petite portion

le sang

de l'arrie-faix faulſement controuuë. Vous deuiez pluſtoſt la referer à la fièvre continue, qui a precedé & ſuiuy l'accouchement, & à la toux, qui a fort tourmenté feu Madame, deuant & apres ſon accouchement, & au flux de ventre, qui a ſuccédé trop toſt apres ſon accouchement, qui ſont trois maladies dangereuſes à vne femme nouuellement accouchée, deſquels vous deuiez avec plus grande précaution vous deffier. J 2. V O I.

Mais pour ſçauoir les ſecrets des maladies des femmes, il faut auoir fréquenté les ſages femmes, & auoir aſſiſté à pluſieurs accouchemens, comme auoit fait voſtre grand Maiſtre & legiſlateur Hippocrate, qui au fait des maladies des femmes, conſultoit les ſages femmes, ſ'en rapportoit à leur iugement. Voyla tout ce que i'ay à vous dire à preſent pour ma de-

science & iustification, contre les calomnies & mesdisances, qui touchent & offensent ma reputation, que ie soubsmets au iugement des Medecins de Paris & autres capables, qui soient hors d'interests, & tels qu'il plaira à leurs Maiestez d'ordonner.

Fait à Paris ce huietieme du  
mois de Iuin 1627.

LOYSE BOURGEOIS docteur

Bourcier.

Bay bien voulu adiouster en suite

de ma relation, le rapport qu'on a distri-

bue dans la Cour, & publié par toute la

ville, afin que chacun cognoisse par ceste

conference la verité de l'affaire.

M O N S I E U R R A P P O R T  
 D E L O U V E R T U R E  
 du corps de feu M A D A M E .

**N** Ous soubs-signés François Vautier Conseiller  
 & premier Medecin de  
 la Reyne Mere du Roy :  
 Pierre Seguin Conseiller & premier  
 Medecin de la Reyne : Rodolphe le  
 Maître Conseiller & premier Me-  
 decin de Monsieur : François Torna-  
 nt Conseiller & premier Medecin de  
 feu Madame : Abel Brunier Conseil-  
 ler & Medecin ordinaire de Mon-  
 sieur : Charles Guillemeau Docteur  
 en Medecine, Conseiller & premier  
 Chirurgien du Roy : Iean Menard,  
 Sirneon Pimperlle Chirurgiens  
 ordinaires de la Reyne Mere du Roy ;  
 Guillaume Carillon Chirurgien or-

dinaire de Monsieur : François Ner-  
 ron Chirurgien ordinaire de feu Ma-  
 dame, Apres auoir ouuert le corps de  
 feu Madite Dame par le commande-  
 ment de la Reyne Mere du Roy, & di-  
 ligemment consideré toutes les par-  
 ties interieures, auons trouue la capa-  
 cité du ventre interieur remplie d'v-  
 ne matiere sanieuse. Les intestins  
 pleins de vent. Le ventricule petit, &  
 enflé. Le foye sec, & petit. La vesi-  
 cule du fiel fort grande. La rarte fort  
 grande, aussi en toutes ses dimen-  
 sions. Les reins petits & bien consti-  
 tuez. La vessie de l'vrine petite. La  
 matrice nageoit dans vne matiere sa-  
 nieuse, enfermée dans l'hypogastre:  
 Elle estoit gangrenée depuis la partie  
 externe iusques au fond, spéciale-  
 ment du costé gauche, & la partie af-  
 fectée fut le *Rectum*. Au costé droict du  
 fond s'est trouué vne petite portion

de l'arriere-faix tellement attachée à la matrice, qu'on n'a peu la separer sans peine avec les doigts. Nous auons trouué les poulmons sains, sans estre aucunement adherants aux costes. Le cœur fort petit. Le pericarde presque sans eau. Le cerueau sans aucun vice. Le tout certifions estre vray, tesmoigns nos noms cy mis. Fait à Paris le cinquiesme Iuin mil six cens vingt-sept.

VAVTIER.	SEGVIN.
LE MAISTRE.	TORNAIRE.
BRVNIER.	GVILLEMEAV.
MENARD.	PIMPERNELLE.
CARILLON.	NERON.